



DEO OPTIMO MAXIMO UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA.

CARDINALITIIS DISPUTATIONIBUS,
manè discutienda in Scholis Medicorum, die Jovis sextâ mensis Martii,
anno Domini MDCC. LXXVII.

M. CLAUDIO-CAROLO DEJEAN,
Doctore Medico, Præsîde.

An diù focus ardentibus assidere, malum?

I.



BI diffugit æstiva temperies, & densis, humidis, gelidis stipatus brumis Autumnus jam terris incumbit, aut hyeme sieviente rigent artus, largè super foco ligna reponere cogit necessitas. Quàm verò sunt pertimescendi dolosi penates! morbi latent in focus eo pejores quod invadunt incautos atque securos. Brumalis autumnus, hyems que dura, si fas ità loqui, vi apertâ homines aggrediuntur. Eorum maleficam intemperiem, vestitu densiori, exercitio, aliisque auxiliis audaces effugiunt. Rustica gens duris assueta laboribus, camposque adire coacta, morborum nescit agmen brumalium & hyber-



norum. Milites impavidi, exercitati, focis infueti, sæpius aerem humidum & frigidum inspirant intacti. Pueri delicatuli in Academiâ studiorum collecti, frequenter rigentes gelu, serè omnes sani vigent & florescunt. Tussis periculosa, morborumque genus multiplex, tenellis infantibus damna vix intentant, à quo balneis frigidis immerguntur, & quasi nudi aeris intemperiei prudenter committuntur.

Verùm sui mali artifices, morbis teterrimis exponuntur ii quos propè focos ardentes diu detinet vita mollis, aut aeris timor pusillus. Et quis huic-ce non assentiet opinioni qui perpenderit ab igne focorum vitari aerem, cuius dotes adulterari nequeunt, quin corpus ipsum adulteretur. Ut autem id maneat inconcussum, vicissim examinandum est, quinam sint ignis focorum effectus in aerem, quinam aeris ignem experti in corpus humanum, quænam demùm ab iis exoriantur incommoda.

I I.

AER corpus est fluidum, compressibile, dilatationis capax, elasticum, ubique diffusum. Physicos adhuc latet genuina ejus natura. Norunt autem pro variis corporibus ei immixtis, varias induere qualitates. Ex iis corporibus, quædam necessaria sunt vitæ fovendæ, ut ignis naturalis & aqua, modò in debitâ quantitate aer ea contineat. Eorum excessus aut defectus constituunt apud medicos varias aeris species, scilicet aerem calidum aut frigidum, humidum aut siccum. Pro variâ eorum quantitate, ea principia, elastici fluidi densitatem aut elatèrium vario modo immutant. Alia verò ità ejus essentiam decomponunt, ut experimentis subditus, pristina non edat phenomena, respiratori vitæque prorsus i tervire nequeat. Hæ sunt emanationes apud Chemicos tam decantatæ, à corporibus fermentantibus, putrefactis, à carbonibus, à calce, ab igne focorum ipso avolantes.

Potèrò densitas aeris & natura in locis focorum igne calefactis immutantur. A nimia quidem dilatatione præcipua phenomena sunt repetenda, præsertim si ligna siccata, maleficis carbonibus prudenter anteposita fuerint. Norunt omnes vii physices periti, præ aliis naturæ corporibus principium igneum vi dilatante pollere, nullum prætereà magis dilatari capax, fluido aereo. Eò enim corpus dilatatu facilius, quò majori fluiditate & levitate gaudet. Id etiam evincunt Thermometrum Drebelianum, & experientiæ Boerhavianæ, quibus constat calore aquæ bullientis, ad tertiam partem ejus voluminis aerem dilatari. Aer autem nimis dilatatus, suo defraudatur elaterio; illud enim semper sequitur ejus densitatem. Prætereà suum humidum aeri deficit, dum igne penetratur nimio, & igneis moleculis plus æquo foetum est fluidum elasticum; demum ignis phlogisto aer inquinatus corrumpitur & indè simul fit calidum, siccum, rarum, vitiatum & indè respiratori inhabile.

I I I.

A multiplici fonte igitur focis nimium indulgentium mala scaturiunt. Et primò aer igne rarefactus & ideo levior, ægrè pulmones adit, eorumque vesiculas vix elasticis distendere impar est, & indè difficilis respiratio. Aere non adjuvante vasa pulmonum sanguine non adimplentur, ad eum expellendum, cor iterum atque iterum frustra contrahitur, motus intenditur circulatorius, pulsus febricitat, adaugetur perspiratio, cum eà vires avolant, & indè anxietates, suffocatio, syncope. Quin imò aer in humoribus nidulans, cum aere

externo æquilandis, nimis dilatur, undè vasorum major distensio, humorum turgescencia, undè plethora notha, functionumque perturbatus ordo.

Nec satis, pejoribus adhuc morbis, quatenus siccus & calidus præbet ansam. Pulmonibus siccis humiditatem optatam, sanguini fervescenti frigus amicum deneget. Imò magis siccantur respirationis organa, fervescit sanguis, & quasi comburitur, indè duræ nimis inflammationes pulmonum, cruenta sputa, hæmoptisæ, asthmata sicca. Præterea sanguis inæquali fluctu partes alluens, inflammationes errore loci procreat, tuncque grassantur angina, nephritis, phrenitis, morbi exanthematici. His motibus violentis humores agitati acrimoniam induunt pessimam, undè febres ardentes, & biliosæ mox è medio tollentes miseros. Simul circumveniunt à nervis affectis nati, ventriculi dolores acuti, sensus depravatio, quandoque pseudo-cholera-morbus.

Felices nimium, si parco phlogisto aer modò contaminetur! disperso enim eo veneno crudeli, maculæ purpuræ, intestinorum, artuum tremores, vomitus, biliosi, sanguinolenti, coma, eos imprudentes plecterent.

His morbis, alii non minùs periculosi jungendi sunt. Corpus aere calido, semper involutum, sit debile, siccum, aridum, imbecillum. Sua humoribus deficit, serositas, sua solidis partibus flexibilitas, sensus & irritabilitas. Torpent functiones universæ. A nervis affectis nascitur affectio hypocondriaci. Demùm miseris urget ignis, dum aëri sese committere audent. Minimo frigore graviter afficiuntur, morborumque iliadi à perspiratione repercussâ, strictioneque fibrarum subitâ ortorum, aliis frequentius obnoxii videntur.

I V.

FACTIS autem & experientiâ fulcitur opinio nostra, statque inconcussa. Quis suos lares fervidos assiduus colens, & sapius sanguinem suum turgentem, non observavit? vasa tumescunt, per totum corporis habitum impeditur anxia circulatio, sanguine rarefacto cerebrum comprimitur, gravatur caput, somnus urget, hebetatur artus, vires deficiunt. Adest ægra respiratio & ut aiunt sublimis, crudi sudores dimanant semper nocivi. Nonne inter divites, & eos quorum foci semper ardescunt, Asthmatici & Hypochondriaci frequentius reperiuntur? Ipsos Asthmate laborantes, de ignis in eos influxu crudeli, interroga? Dum liberiori gaudent respiratione, vix ignis patientes sunt, instante paroxysmo, calore dirè cruciantur, moxque suffocarentur, si suam in aere frigido salutem non reperirent. Quat phisæ ab eo fonte suam duxerunt originem? Quis sapissimè non fuit expertus, quàm in camera focis calefactâ, somnò indulgere periculosum esset. Somnus ille nedùm reficiat, corporique dulce levamen & lacrimatam restituat, hoc miserum exagitat, vexat, subvertit. Demùm in iis, quos propè foci amor ignis diu detinet, incocta fere remanent ingesta, praveque digestionem sequuntur. Quomodò res aliter se haberet? èd magis minuitur naturalis calor, quò magis externus corpori conceditur. Hæc sunt Hippocratis.

Quid plura? dum captabunt aerem frigidum, fors eos alia miserabunda manet: *Omnis mutatio subita naturæ inimica*, inquit divus senex. Sit ne aer humidus, subitò eos corripit diarrhæa pertinax à perspiratione repercussâ ducens ortum. Debiles infarciuntur pulmones, febribus intermittentibus, catarrhis humoralibus, fluxionibus omnigenis per totum hyemis decursum laborant. Fluore albo mulieres debilitantur. Si frigus sæviat, coryza, raucedo, angina, asthmata; peripneumonia notha circumveniunt. Sunt etiam exempla quædam hominum

subita morte percussorum, dum à foco ardente, in gelidum aerem transferunt. Tunc quoque, à sero revulso muscoli diris rheumaticis doloribus non raro cruciantur. Extremitates ipsas urgent scissuræ, inflammationes, ulcera. His passionibus obnoxii vivunt magnates, mulierculæ, dum eas ferè nesciunt omnes exercitatissimi, & ii quos à focus ardentibus, voluptas aut negotia sedulo arcant.

V.

JAM verò increpant omnes, quos otium aut munera quædam focus alligant. A focorum igne nihil pertimescendum. Aeri rarefacto, in auras pro sua levitate avolanti, novus succedit densus, elasticus, pulmonum amicus. Physicorum theoriæ ne nimium crede. Certè quidem foci, aliquid habent commodi. Quis verò ignem reflecti inficias ibit, dum totius cameræ aer igne focorum incalescit, dum variis odoribus combustis idem inquinatur, ita ut eorum naturam olfactus eximie dijudicet. Verùm inquires quomodo aeris humidi aut hyemis sævitiam effugere? *Utrumque* lex summa, nequid nimis. Modus est in rebus, foci moderati, etiam si vices exercitii ad sanitatem tuendam non omnino adimpleant, admodum conducere valent. Sanguinem ad interna frigore coactum, ad externa reducunt, sique arcant stases, inflammationes, & gangrænam. Dum etiam humido aere undique perspirationis viæ obcluduntur, ægrè suas partes agunt pulmones, corpulque stat plenum & oppressum, calor focorum lenis aerem siccando, tonumque fibræ conciliando, sanitatem jam titubantem sustinet & corroborat. Si verò felices effectus igni debentur juxta leges hygiaticas instructo. Talis est qui temperatam ad sensum reddit athmosphæram. Sed tamen eo igne malè afficeretur, qui nimis assiduus ei assideret. Tunc enim ab exercitii defectu nata eum aggredirentur incommoda. Quæ cum ita sint, & ab igne focorum ardenti vitari aerem, & ab illo aere vitato, sicut ab igne ipso multas machinæ humanæ noxas exoriri comprobetur, nihil moras nectere valet quin concludamus:

Ergo diu focus ardentibus assidere, malum.

Proponebat Parisiis EDMUNDUS-JOACHIM BOURDOIS

-DE LA MOTTE, Joviniaco-Senonenfis, Saluberrimæ Facultatis

Medicinæ Parisiensis Baccalaureus, Theosopha Auctor, A. R. S. H. 1777,

à sextâ ad meridiem.

Typis QUILLAU, Universitatis & Facultatis Medicinæ Typographi. 1777.